



Պարույր Սևակ

Լավագույնը

Լավագույն ժպիտ ասվածը, անշոն'ուտ,

Փա՛կ աչքերովն է:

Իսկ լավագույնը երազանքների՝

Բա՛ց աչքերովը:

Լավագույն երգը

Բաց պատուհանից - հեռվից լսածն է:

Լավագույն խոսքը

Լռության խորքում լռին ասածն է:

Լավագույն ազգը այն է, երևի ,

Որ չի ունենում հսկա կայսրություն:

Լավագույն հավատն այն է, որ երբեք

Չի դառնում կրոն:

Լավագույն դիմակն այն է, անկասկա՛ծ,

Որ կոչվում է դեմք:

Լավագույն դերը՝

Վա՛տ խաղացվածը:

Լավագույն սերը՝

Կիսա՛տ թողածը:

Լավագույն տանջված ու տառապածը

Վարդն է (երգերո՛ւմ):

Լավագույն կապիկն աշխարհում (Էլի՛՛)

Մարդն է երևի:

Լավագույն մարդն էլ (ո՛չ մի երևի)

Ներեցեք... ես եմ...

13.III.1967թ.

Արզնի